

zuzendariari

(0034) 943 300 222



zuzendariari@egunkaria.com



Martin Ugalde kultur parkea 20140 Andoain

Matrikulazioa EHU

Gabriel Elgoro-Arestizabal (EHUko Matrikulari buruzko Informazio Zerbitzuko langilea)

Ekainaren 3tik aurrera, EHU-UPVk mar-txan jarri du Unibertsitatera sartzeko infor-mazio zerbitzu telefonikoa. Zerbitzu honen eginkizuna UPVra deitzen duten guztiei Unibertsitate Publikoan sartzeko behar du-ten informazio guztia ematea da. Iragan ur-tean hainbat lagun kontratu zituen UPVk zerbitzua emateko, maiatzetik urrira bitar-tean, hots, 6 hilabetez. Aurten aldiz, gauzak aldatu dira. Aldaketak, aitzitik, ez dira beti onerako izaten, kasu honetan bezala.

Hain «garrantzitsua» den zerbitzu hau (EHU-UPVren goi mandatariek prentsaren aurrean esandakoari erreparatu gero)

UPVko Akademi Gestiorako Zerbitzuaren Artxiboan kokatu dute, oso egoera kaxka-rean. Korrika eta presaka garbiketa egin, blokatu zituen leihoak zabaldu ahal izate-ko pilaturik zegoen material guztia atera, menpekoa korridorean kokatu eta bi mahai zaharretan lau lagunak jarri nahi zituzten gure unibertsitateko agintariak. Langileek berek topatu behar izan zuten (genuen) ar-txiboan bertan zegoen armairutxo bat, apa-lak jarri eta bestelako tresneria, lehioak ezin dira zabaldu (zabalduz gero izoztu egin gai-tezkeelako), kiratsa dago, ... Lan Osasuneko Zerbitzuaren teknikariren batek txostenen bat prestatu du zerbitzu honen gaineko lan baldintzak direla eta. Espero dezagun gure lana bukatu baino lehen horren berri izatea, baina ez dugu esperantza handirik.


Bestalde, Zerbitzua atenditzeko 4 langile

kontratu ditu EHU-UPVk. Honetan ere bi-txia izan da gertaturikoa. Biri lau hilabeteko kontratua egin zaie (ekainetik irailera) eta beste biri *kontratu zaborra* dei dezakeguna: ekaina eta uztailean lan, abuztuan opo-rrak... INEMen, eta irailean berriro lanera. Antza, EHU-UPVko agintariak askar asko ikasi dituzte enpresa pribatuek erabili ohi dituzten trikimailuak. Bitxia gero Unibertsitate Publikoaren jokabidea! Zerbitzuaren kalitatea, langileen lan-baldintzak eta abar bost axola. Kontuan hartzekoa da, esatera-ko, 4 hilabeteko kontratua egin zaienei esan zitzaiela ez zutela oporrik izango eta, aldiz, beste biei, oporrak bai... baina langabezia izango dituztela.

Zer egingo luke EHU-UPVk, esaterako, honelako baldintza kaxkarretan kontrata-tuak izan garenok gure lan-produktibitatea

egokituko bagenu egin diguten lan-kontra-tuaren baldintzen arabera? Nola geldituko litzateke Zerbitzua? Badirudi, edozelan ere, UPVko agintariak kontratatutak izan gare-non profesionaltasunean (edo gure eskubi-deak ez defendatzeko borondate edota gai-tasun ezean?) sinetsi egiten dutela, ezen bestela... Gainera, PPren Gobernuak atera-tako Dekretazoarekin, kaltetuak langileok izango gara, ezen, oporrak lan-kontrata-uren iraupenaren barruan hartzen ez baditu-gu, abuztuan langabezia egongo garen al-ditik deskontatuko litzazkigukeelako lan-gabezia. Hots, INEMek UPVren trikimai-lua zigortu beharrean, horren ondorioak pairatuko ditugun langileok zigortuko gaitu. Nik behintzat badut beste arrazoi pare bat azken aldian EHU-n ohiko bilakatzen ari di-ren kontratazio zabor hauek salatzen.

montxo



galdeiozu... ?



MIKEL KAZALIS

Gero eta disko gehiago kaleratzen dira Euskal Herrian, baina ez al da gero eta jende gutxiago joaten kontzertuetara? Zuek ere nabaritzen duzue hori?

Amaia Agirre (Donostia)

Musikaria

Guk, egia esan, ez dugu gure kontzertuetan hori naba-ritu. Egia da disko asko kaleratzen direla, baina kon-tzertuak ere ugari dira Euskal Herrian. Egunkarietako zerrendetan ikus dezakezu asteburuero laurogei kon-tzertu inguru ditugula aukeran, eta Euskal Herrian gu-txi gara guztiak jende gainezka betetzeko. Horrez gain, gazteriaren aisialdia gozatzeko ohiturak alda-tzen ari direla diote. Egiten duguna sinestea da, gure aldetik, horri aurre egiteko modu bakarra.

Irailaren 17tik aurrera **Martxelo Rubio • Aktorea** izango da Galdeiozu ataleko gonbidatua. Bidali zure galderak ordurako.

hirusta

Fredi Paia



Irailak hamabi

Atzo, AEBek bere lurraldean jaso duten eraso handienaren urteurrena izan zen. (Pearl Harbor alde batera utzita). Ko-munikabide gehienek moral merke bonbarda-tu gaituzte berriro ere. Hildakoen izenak iraku-ri, heroi nazionalen apologia egin eta mendeku gosea berpiztu. Omenaldi ederra, bai jauna.

Gaur beraiek, amerikarrek eta bere kide eu-roparrek, eragin dituzten eta eragiten dabil-tzan basakeriak gogorarazteko egun egokia izan dai-teke. Oraindik bai baitago World Trade Center-ekoa arrazoirik gabeko eraso terrorista izan ze-la sinesten duen jenderik. Hasi dezagun bada gure omenaldi xumea:

Betoz Afganistango gudan hildako errugabe guztiak, Irakeko enbarguak hildako haurrak, yankiek ordaindutako talde paramilitarrek hil-dako laborariak, CIAk gobernuan jarritako dik-tadoreek desagerrarazitako militante ezkertia-

rrak, Vietnamen isuritako produktu toxikoek hildako milaka pertsona, animalia eta ekosiste-ma, orain besteren eskutan hainbeste kezka-tzen dituen lehergailu atomikoa erabiltzeagatik Hiroshiman eta Nagasakin hildakoak, kapitalis-mo basati honen biktima ikusezinak...

Hamarkada bateko omenaldia behar genuke izen guztiak irakurtzeko. Gainera ez genuke amaituko, uneoro biktima berriak daudelako.

Ekonomia sistema kapitalistak eta bere se-mea den inperialismoak bi zatitan banatu dute mundua: zapaltzaileak (%20) eta zapalduak (%80). Azken hauentzako egoera guztiz jasan-gaitza da. Pastelaren zati handiena jaten dugu-nok gogoeta sakona egin behar dugu, ekono-mia eredu hau hormaren kontra doan frenorik gabeko autoa delako. Prest egon behar dugu zenbait gauzari uko egiteko denok duintasunez bizi gaiten. Bestela, Alak anpara gaitzala.